

Sustegn urgent er per las medias

Il Cussegl federal sto suttacumber a la cumissiun da traffic e telecomunicaziun

DA MARTIN CABALZAR/FMR

■ **Resguardond la reducziun marcanta da las entradas da reclama tar las medias han las cumissions da traffic e telecomunicaziun dal Parlament federal inoltrà duas moziuns per in sustegn urgent a las medias.** Cunter la voluntad dal Cussegl federal ha il Cussegl dals chantuns approvà tuttas duas moziuns per in sustegn urgent. Entant ch'il Cussegl federal vuleva reglar cunzunt il sustegn a la pressa ed als emetturs da radio e televisiun privats pir en connex cun la tractaziun dal messadi correspondent ha il Cussegl dals chantuns decidì cun gronda maiorità d'agir immediat cun in sustegn urgent sco mesira transitorica. Quai sin proposta da cusseglier dals chantuns *Stefan Engler* (PCD GR) ch'ha presidià la cumissiun. Cun in'iniziativa parlamentara aveva Engler gi' mess en rocla in sustegn statal per facilitar la transformaziun digitala da las medias.

Agid concret ed immediat

Quest agid concret ed immediat è da natura transitorica e duai esser valaivel fin ch'il nov messadi che cuntegn mesiras a lunga vista va en vigur. Concret vai per sustegnair il proxim mez on l'agentura sda/Keystone cun ina summa da maximal 10 milliuns. Cun questa summa duai l'agentura da novitads naziunala sda pudair metter a disposiziun gratuitamain ses texts en trais linguas. Per la part rumantscha procura la nov fundada Fundaziun Medias Rumantschas gia uss per quest servetsch gratuit. Secundo vegnan las gasettas localas e regiunalas distribuidas gratuitamain da la Posta Svizra (ca. 25 milliuns) e terzo vegn concedi ina



Cusseglier dals chantuns **Stefan Engler** presidescha la cumissiun da traffic e telecomunicaziun.

MAD

contribuziun per distribuir las ulteriuras gasettas dal di (ca. 10 milliuns). Plinavant duain ils purtaders d'emetturs privats da televisiuns e radios locals vegnir sustegnids cun ina contribuziun supplementara da 30 milliuns. En connex cun la crisa da corona dastgan las medias privatas pia quintar cun in sustegn supplementar da summa sumarum 55 milliuns.

Pluralissem da medias è indispensabel per la democrazia

En ses votum introductiv ha il parsura da la cumissiun, Engler, accentuà la muntada indispensabla da medias libras e pluralisticas per la democrazia. «Senza talas medias po l'opiniun publica vegnir manipulada e las infurmaziuns vegnir canalizadas e controlladas d'intginas paucas chasas da medias», ha avertì Engler. La concentraziun da medias saja nungjavi-

schada e mainia inevitablmain a rusnas, cunzunt tar la purschida schurnalistica locala e regiunala. Radund 90 perschient da las votantas e dals votants sa basian tar votazuns ed elecziuns tras gasettas u lur servetschs d'online per furmar lur opiniun. Premissa saja dentant che medias possian rapportar a moda objectiva, equilibrada e correcta e senza squitsch d'ordaifer. Perquai saja ina cuntrada da medias multifara relevanta tant per il sistem democratic sco per ademplir in service public. En quest senn anticipeschian las duas moziuns parzialmain las finamiras dal messadi per il sustegn da las medias gia elavurà dal Cussegl federal ch'intenda ina purschida attractiva, vasta ed eguala da las medias en tut las regiuns linguisticas, punctuescha Engler. Ils problems structurali da la pressa sajan dentant s'accelerads a moda talmain massiva

en connex cun Covid-19. Senza in agid svelto e substanzial smanatschia in tagl radical da la cuntrada da pressa, dentant era dals emetturs privats da radio e televisiun, ha avertì Engler. I saja bain in paradox: Entant che l'infurmaziun da las medias è adina pli tschertgada en quest temp da crisa è il matgà d'inserats crudà ensemen, privond uschia las gasettas da lur basa finanziaria.

Sustegn e resalvas

Sustegn è Engler vegnì cunzunt da *Paul Rechsteiner* (SP SG) e da *Marianne Matter* (PCG VS) entant che *Hansjörg Knecht* (PPS AG) ha punctuà che las chasas edituras stoppian sezzas surpigliar dapli responsabladad, tant pli che bleras hajan gudagnà blers daners cun ulteriurs secturs d'affar e possian anc adina sa prestar da condescher grondas dividendas.

Cussegliera federala *Simonetta Sommaruga* ha defendì la posiziun dal Cussegl federal, argumentond ch' il messadi che vegn tractà proximamain en il cussegl cuntegnia gia pliras mesiras substanzialas per garantir ina pressa multifara e per dar dumogn a la transformaziun digitala. I na saja betg l'incumbensa da la politica da prescriber a las interpresas tge model da gestiun ch'ellas hajan da persequitar. Entant ch'il dretg d'urgenza saja limità a sis mais porschia il nov messadi che duai vegnir tractandà cun prioritad en ina da las proximas sessiuns a las medias perspectivadas a lunga vista e quai tant a la pressa sco a televisiuns e radios privats, ha punctuà Sommaruga.

La finala è il Cussegl dals chantuns tuttina suandà cun grond surpli la proposta da la cumissiun ed approvà las duas moziuns cun 32:10 resp. 40:3 vuschs.